

दिनांक 01.01.2025

समय: 18.45 बजे

- केन्द्रीय मंत्रिमंडल प्रधानमंत्री फसल बीमा योजना अर पुनर्गठित मौसम आधारित फसल बीमा योजना जारी राखण रो फैसलो कीनो-डीएपी खाद माथे सब्सिडी बधा र साढ़े तीन हजार रुपया प्रति मीट्रिक टन करी ज्यी।
- प्रदेश मांय राष्ट्रीय सड़क सुरक्षा महीनो सुरू व्हयो- 31 जनवरी तांई जागरुकता कार्यक्रम राख्या जावेला।
- नुवा साल रा पैला दिन मिन्दरां अर धार्मिक ठोडां मोटी तादाद मांय जातरू पूग्या।
- प्रदेश रा कुछ हलकां मांय आवता दिनां घणो कोहरो रेहवण अर शीत लहर चालण रा आसार।

000

मंत्रिमंडल डीएपी खाद माथे सब्सिडी बधा र साढ़े तीन हजार रुपया प्रति मीट्रिक टन करण री मंजूरी ई दे दीनी। श्री वैष्णव कह्यो के ई सारू आवण वाळो अतिरिक्त खर्चो केन्द्र सरकार उठावेला।

000

प्रधानमंत्री नरेन्द्र मोदी कैबिनेट रा फैसलां रो स्वागत कीनो। वे सोशल मीडिया रे जरिये कह्यो के नुवा साल रो पहलो फैसलो किसानां ने समर्पित है। केन्द्रीय कृषि अर किसान कल्याण मंत्री शिवराज सिंह चौहान ई मंत्रिमण्डल रा फैसलां रो स्वागत कीनो है।

000

केन्द्र सरकार आज वन नेशन वन सब्सक्रिप्शन-ओएनओएस योजना सुरू कीनी। ई रो मकसद विद्यार्थियां री एक सब्सक्रिप्शन प्लेटफॉर्म रा तैत शोधपत्रां, जर्नल्स अर भणार्ई-लिखाई ऊं जुड़ी सामग्री तांई पहुँच आसान बणावणो है। विश्वविद्यालयां अर आईआईटी समेत सरकारी मदद ऊं चाल रह्या आला दर्जा रा शिक्षण संस्थानां रा एक करोड़ 80 लाख विद्यार्थियां ने ई पहल ऊं दुनियाभर री आला दर्जा री जर्नल्स मांय छप्योड़ा शोध पत्र देखण रो सुबीतो ई मिलेला। आ योजना तीन दौर मांय लागू करी जावेला।

000

प्रदेश मांय आज राष्ट्रीय सड़क सुरक्षा माह सुरू व्हयो। ई रा तैत 31 जनवरी तांई सड़कां माथे हिफाजत अर आवण-जावण रा नियमां रा बारा मांय जाग जगावण सारू खास कार्यक्रम राख्या जावेला।

इण रो ई साल रो मुद्दो “परवाह” राख्यी ज्यो है। ई मौके हनुमानगढ़ मांय आज जागरुकता रैली निकाळी ज्यी। करौली मांय यातायात पुलिस न्यारी-न्यारी ठोडां चैक प्वाइंट बणा र यातायात नियम नी मानण वाळां रे खिलाफ कार्रवाई कीनी। वठे हेलमेट लगाओ- जान बचाओ अभियान रा तैत हेलमेट जनजागरुकता बाइक रैली निकाळी ज्यी। पाली मांय सड़क हादसां माथे काबू करण सारू पुलिस री नुवी तकनीक वाळी इंटरसेप्टर गाडी रो उद्घाटन करी ज्यो। झुंझुनूं रा खास-खास गेलां ऊं व्हेती थकी ई-रिक्शा रैली निकाळी ज्यी। जिला परिवहन अधिकारी डॉ. मक्खन लाल जांगीड़ बतायो के ई-रिक्शा रे मार्फत महीना भर तांई यातायात नियमां री जाणकारी दी जावेला।

000

बाड़मेर मांय मल्लीनाथ चौराहा ऊं वाहन रैली निकाळ र यातायात नियमां री पालना करण रो संदेश दियो ज्यो। ब्यावर मांय ई यातायात पुलिसकर्मी दूजां सागे रैली निकाळ र दुपहिया वाहन चलाती बगत हेलमेट लगावण री अपील कीनी।

000

आज नुवा साल रो पैलो दिन उमाव, ऊर्जा अर हरख सागे मणायी ज्यो। लोग मिंदिरां अर धार्मिक ठोडां दर्शन कर र नुवा साल रो स्वागत कीनो। मिंदरां मांय मोटी तादाद मांय जातरू पूग्या। राजधानी जयपुर मांय मोती डूंगरी रा गणेश मिन्दर अर गोविंद देव जी मिन्दर समेत न्यारा-न्यारा

मिन्दरां मांय जातरु दर्शन कर र पूजा-अर्चना कीनी। म्हाणा खबरनवीस बतायो के मुख्यमंत्री भजनलाल शर्मा ई मोती डूंगरी मिन्दर मांय दर्शन कर र जनता री खुशहाली री कामना कीनी।

000

इण ऊं पैली मुख्यमंत्री आज डीग जिला रा पूछरी का लौठा मांय श्रीनाथ जी रो अभिषेक कीनो। वे अहलकारां ने मिन्दर मांय सुबीता और बधावण सारु जरूरी हुकम दीना। चूरु जिला रा सालासर बालाजी मिन्दर मांय आरे-सारे रा राज्यां ऊं ई जातरु पूग्या। रणथम्भौर रा त्रिनैत्र गणेश मिन्दर मांय ई मोटी तादाद मांय जातरु पूग्या। चौथ का बरवाड़ा रा चौथ माता मिन्दर मांय ई मोटी तादाद मांय जातरु दर्शन कीना। जैसलमेर जिला रा तनोट माता मिन्दर मांय करी ज्यी खास आरती मांय बीएसएफ रा अहलकार, जवान अर दूजा जातरु मौजूद रह्या। राजसमंद जिला रा श्रीनाथ जी मिन्दर अर सीकर जिला रा खाटूश्यामजी अर जीण माता मिंदर मांय ई मोटी तादाद मांय लोग दर्शन सारु पूग्या। करौली जिला रा कैलादेवी अर मदनमोहन जी मिन्दर मांय ई दूर-दराज ऊं लोग आराधना सारु पूग्या। चित्तौड़गढ़ जिला रा सांवलियाजी मिन्दर मांय आज रिकॉर्ड तादाद मांय जातरु पूग्या। म्हाणा खबरनवीस बतायो के संवारे पांच बज्यां व्ही मंगला आरती मांय ई जातरुआं री लम्बी लेणां निजर आई।

000

जातरुआं री मोटी तादाद ने ध्यान राखता थकां प्रशासन अर पुलिस री ओर ऊं हिफाजत अर आवण-जावण रा खास इंतजामात करी ज्या। केई लोग जरूरतमंद लोगां ने जरूरी चीजां दान कर र नुवा साल री सरुआत कीनी। अजमेर मांय सीआरपीएफ री ओर ऊं जवाहर लाल नेहरू अस्पताल मांय मरीजां ने कम्बल दिया ज्या। आज नुवा साल री सरुआत रे मौके राज्यपाल हरिभाऊ बागडे ऊं मुलाकात सारु ई मोटी तादाद मांय आम अर खास लोग पूग्या। राज्यपाल सगळां ने बधाई देता थकां मंगल कामना कीनी। लोकायुक्त प्रताप कृष्ण लोहरा ई राज्यपाल ऊं मुलाकात कर र वां ने प्रदेश रो 36वों वार्षिक प्रतिवेदन सूप्यो।

000

प्रदेश रा कुछ हलकां मांय आवता दिनां घणी धुंअर रेहवण अर कठे-कठे शीत लहर चालण रा आसार है। मौसम विभाग से मुजब आवता चौबीस घंटा मांय पारो 2 ऊं 3 डिग्री सेल्सियस ताई चढ़बा रा आसार है। बीचे आज संवारे सवाईमाधोपुर, चूरु, भरतपुर, अजमेर, नागौर, हनुमानगढ़, झुंझुनूं, झालावाड़ अर भीलवाड़ा मांय कोहरा रे कारण आवण-जावण मांय परेशानी आयी। कठे-कठे 10 ऊं 50 मीटर ताई ई निजर आयो। बीती रात सब ऊं कम 4 डिग्री सेल्सियस न्यूनतम तापमान सीकर मांय दर्ज करी ज्यो। म्हाणा खबरनवीस बतायो के वठे आज संवारे धुंध रे कारण लोगां ने परेशानी रो सामो करणो पड़्यो।

000

बाडमेर मांय आज अमृता हाट मेळो सरु व्ह्यो। इण मांय 50 ऊं बत्ता खुद सेवक समूहां री ओर ऊं न्यारा-न्यारा सामान री स्टॉल्स लगाई ज्यी है। मेळो 5 जनवरी ताई चालेला।

000

पाली जिला रा सांडेराव मांय आज वीर मामाजी मेळो भर्यो, जिण मांय कैबिनेट मंत्री जोराराम कुमावत ई सिरकत कीनी। ई मौके वे मुख्यमंत्री मंगला पशु बीमा योजना अर गौ पालक कार्ड समेत राज्य सरकार री किसानां रा भला री योजनावां री जाणकारी दीनी।

000

राज्य मांय मुख्यमंत्री मंगल पशु बीमा योजना रा तैत ढांढा-ढोरां रो बीमो करावण सारु 12 जनवरी 2025 ताई अर्जी दी जा सके है। डीग री पशुपालन उप निदेशक डॉक्टर भावना यादव बतायो के ई योजना रा तैत जिला मांय बीस हजार पशुआं रो मुफ्त बीमो करायो जावेला।

000